

# CONVENIO DE COLABORACIÓN ENTRE A CONSELLERÍA DE CULTURA, LINGUA E XUVENTUDE, E O SERVIZO GALEGO DE SAÚDE PARA A IMPLANTACIÓN DO PROGRAMA XUVENTUDE CONSCIENTE DA SAÚDE MENTAL NA COMUNIDADE AUTÓNOMA DE GALICIA.

En Santiago de Compostela, na data da sinatura electrónica

## REUNIDOS

Dunha parte, D. Antonio Gómez Caamaño, Conselleiro de Sanidade e Presidente do Servizo Galego de Saúde, de acordo co establecido no artigo 34 da Lei 1/1983, do 22 de febreiro, de normas reguladoras da Xunta e da súa Presidencia, e cos Decretos 144/2024 e 145/2024, do 20 de maio, polos que se establecen as estruturas orgánicas da Consellería de Sanidade e do Servizo Galego de Saúde, respectivamente , así como co establecido na Lei 1/2016, do 18 de xaneiro de transparencia e bo goberno, e na Lei 40/2015, do 1 de outubro, de réxime xurídico do sector público, actuando en virtude das atribucións que ten conferidas.

Doutra parte, José Carlos López Campos, Conselleiro de Cultura, Lingua e Xuventude, de acordo co establecido no artigo 34 da Lei 1/1983, do 22 de febreiro, de normas reguladoras da Xunta e da súa Presidencia, e de conformidade co Decreto 146/2024, do 20 de maio, polo que se establece a estrutura orgánica da Consellería de Cultura, Lingua e Xuventude.

As partes recoñécense capacidade e representación suficientes para formalizar o presente convenio de colaboración, e na súa virtude

## EXPOÑEN

**Primeiro.-** Que o Servizo Galego de Saúde e a Consellería de Educación, Ciencia, Universidades e Formación Profesional veñen desenvolvendo o *Protocolo de prevención e actuación nos ámbitos sanitario e educativo ante o risco suicida infanto-xuvenil* do que forma parte o programa YAM, *Youth Aware of Mental Health*, que significa *Xuventude Consciente da Saúde Mental*, programa escolar dirixido á mocidade entre 13 e 17 anos no que aprenden e debaten sobre saúde mental, e que se enmarca dentro do Plan de prevención do suicidio de Galicia cofinanciado polo Fondo Social Europeo+ .

O YAM é un programa de prevención universal cuxo obxectivo é chegar ao maior número de



estudantes posible, por iso, é fundamental traballar coa mocidade onde está, é dicir, nas escolas, que é o lugar onde a mocidade pasa a maior parte do seu tempo e onde teñen a maioría das súas interaccións sociais. O programa lévase a cabo cun horario ordinario, durante tres días cun total de cinco horas.

Os profesionais que imparten o YAM contan con experiencia previa no traballo coa mocidade e a saúde mental. En Galicia os/as instrutores YAM son profesionais especificamente formados da Consellería de Educación, Ciencia, Universidades e Formación Profesional e do Servizo Galego de Saúde.

Para ser instructor/a YAM é preciso realizar unha formación intensiva dunha semana de duración que imparte un equipo da Universidade Karolinska (institución creadora do programa).

Ademais da figura do profesional que desenvolve o YAM é preciso que na aula haxa unha segunda persoa que se denomina Helper, figura de apoio ao traballo da persoa instrutora no desenvolvemento das sesións do programa YAM.

**Segundo.-** Que á Consellería de Cultura, Lingua e Xuventude, de conformidade co artigo 17 do Decreto 146/2024, do 20 de maio, a través da Dirección Xeral de Xuventude, correspóndenlle, entre outras funcións, a dirección e xestión das actuacións en materia de voluntariado, a elaboración e o seguimento dos instrumentos de planificación, de rexistro, da xestión dos órganos colexiados e todas aquelas actuacións en aplicación da Lei galega 10/2011, do 28 de novembro, de acción voluntaria.

**Terceiro.-** No ámbito da Comunidade Autónoma, a citada Lei 10/2011, do 28 de novembro, sinala que a participación da cidadanía na vida política, económica, cultural e social é unha aspiración propia de calquera sociedade moderna e democrática. Na actualidade constitúe tamén un compromiso que deben cumprir os poderes públicos, que se atopan compelidos a facilitaren e promoveren as condicións necesarias para facer efectiva a devandita participación.

Esta participación social vese consolidada cando as persoas e os grupos nos que se integran desenvolven por si mesmos, e dunha forma totalmente libre, altruísta e solidaria, actuacións que procuran o benestar social e a mellora da calidade de vida da comunidade. Cando estas actuacións deixan de ser un acto illado e espontáneo, e pasan a se efectuar nun marco institucional organizado e mediante entidades creadas *ad hoc*, é cando ten lugar o desenvolvemento dunha acción voluntaria.



A acción voluntaria é manifestación explícita da conciencia solidaria da cidadanía e fortalece a convivencia democrática, e debe ser, como xa queda dito, promovida polos poderes públicos. Son estes os que teñen a responsabilidade de crear as estruturas e o soporte legal preciso que posibilite, dende a liberdade, que a sociedade civil interveña no desenvolvemento de actividades e sectores de interese xeral e mais na consecución dos intereses públicos mediante a acción voluntaria.

No artigo 5.2 da Lei 10/2011, de 28 de novembro, recóllese que aos efectos desta lei, considéranse incluídas dentro do ámbito da acción voluntaria a realización de actividades de interese xeral vinculadas coas de natureza sociosanitaria.

Por maior abastanza, o artigo 27.4º da Lei 8/2008, de 10 de xullo, de Saúde de Galicia, dispón que a colaboración das organizacións de voluntarios e cooperantes coas organizacións sanitarias adscritas ou vinculadas á Consellería de Sanidade poderá instrumentarse, no seu caso, a través de convenios, concertos, programas de subvencións e outros, de conformidade coa natureza da colaboración que pretenda establecerse.

**Cuarto.-** Que o **PROGRAMA XUVENTUDE CONSCIENTE DA SAÚDE MENTAL** é un proxecto que consiste no acompañamento das persoas usuarias e dos/as profesionais que imparten o programa YAM, con persoas voluntarias denominadas para este proxecto como Helpers.

Polo anterior, o Servizo Galego de Saúde comprométese a prestar a súa colaboración para o desenvolvemento da actividade do voluntariado a través do **PROGRAMA XUVENTUDE CONSCIENTE DA SAÚDE MENTAL** en consonancia co estipulado na mencionada Lei 10/2011, de 28 de novembro, e na Lei 8/2008, de 10 de xullo.

**Quinto.-** Tendo en conta o anterior, o Servizo Galego de Saúde e a Consellería de Cultura, Lingua e Xuventude manifestan a súa vontade de colaborar na implantación dun programa de voluntariado social nos centros educativos nos que se desenvolve o programa YAM e, con tal finalidade, acordan a sinatura do presente convenio de colaboración con suxeición ás seguintes:

## CLÁUSULAS

**Primeira.-** Obxecto



O obxecto do presente convenio é establecer unha canle de colaboración entre a Consellería de Cultura, Lingua e Xuventude, a través da Dirección Xeral de Xuventude, e o Servizo Galego de Saúde, a través da Dirección Xeral de Asistencia Sanitaria, para a implantación do **PROGRAMA XUVENTUDE CONSCIENTE DA SAÚDE MENTAL**, un programa consistente no acompañamento das persoas usuarias e dos/as profesionais que imparten o programa YAM, con persoas voluntarias denominadas para este proxecto como Helpers.

## Segunda.- Acción Voluntaria

1. A través do **PROGRAMA XUVENTUDE CONSCIENTE DA SAÚDE MENTAL**, a Consellería de Cultura, Lingua e Xuventude, a través da Dirección Xeral de Xuventude, seleccionará ás persoas interesadas en participar como Helpers, figura de apoio ao traballo da persoa instrutora no desenvolvemento das sesións do YAM, observando todo o que sucede na aula e que se pode escapar aos ollos da persoa instrutora.

2. Entre as accións que se poden levar a cabo dentro do programa cómpre mencionar como funcións dos Helpers:

a) Manter un clima que permita o desenvolvemento do programa.

b) Facilitar e promover a participación do alumnado.

c) Prestar atención ás reaccións do alumnado, avisando á persoa instrutora se fora precisa unha atención individual.

d) Colaborar coa persoa instrutora na planificación e desenvolvemento das sesións de dilemas e role-play.

e) Axudar na preparación do espazo seguindo a filosofía YAM.

f) Observar todo o que sucede na aula e que se pode escapar aos ollos da persoa instrutora.

3. No caso da atención individual, o labor do persoal Helpers non é resolver o problema subxacente senón facilitar que a persoa se exprese nun espazo máis privado, se sinta escoitada e poida volver ao seu estado emocional previo.

4. As citadas actividades desenvólvanse polo persoal voluntario cun carácter altruísta e solidario e sen obstaculizar o funcionamento do centro asistencial.



## Terceira.- Orzamento

O presente convenio de colaboración non suporá custo adicional para as partes implicadas no seu desenvolvemento, sen prexuízo da cobertura das persoas voluntarias polo seguro de accidentes e responsabilidade civil que se integra na póliza xeral que mantén a Dirección Xeral de Xuventude para todos os seus programas.

## Cuarta.- Compromisos das partes

1. O Servizo Galego de Saúde, comprométese a:

a) Impartir cursos de formación ás persoas voluntarias.

b) Asumir a coordinación e supervisión do programa de voluntariado.

c) Publicitar o programa a través da súa web.

d) Designar a unha persoa que realice as labores de supervisión e coordinación co persoal da Consellería de Cultura, Lingua e Xuventude, a través da Dirección Xeral de Xuventude.

2. A Consellería de Cultura, Lingua e Xuventude, a través da Dirección Xeral de Xuventude, comprométese a:

a) Xestionar e supervisar a inscrición das persoas voluntarias a través da páxina web voluntariadogalego.org, procedendo posteriormente á súa selección por orde de inscrición, logo da comprobación do cumprimento dos requisitos esixidos polo programa (maioría de idade, empadramento nalgún concello da Comunidade Autónoma e realización dun curso básico de voluntariado).

b) Proporcionar a cobertura das persoas voluntarias polo seguro de accidentes e responsabilidade civil que se integra na póliza xeral que mantén a Dirección Xeral de Xuventude para todos os seus programas.

c) Identificar e acreditar as persoas voluntarias.



d) Garantir a formalización por parte das persoas voluntarias dun compromiso de confidencialidade respecto da información e datos persoais aos que puidesen ter acceso durante o desenvolvemento do programa, o que se levará a cabo mediante a sinatura das correspondentes cartas de compromiso.

e) Difundir as actividades obxecto deste convenio mediante a súa inclusión na páxina web da Dirección Xeral de Xuventude e nas súas redes sociais.

f) Supervisar as persoas voluntarias e coordinalas co persoal do Servizo Galego de Saúde designado para o efecto.

g) Permitir o acceso á Plataforma de formación da Dirección Xeral de Xuventude para impartir as actividades formativas deste programa de voluntariado, derivadas do establecido na cláusula cuarta en relación ós compromisos do Servizo Galego de Saúde sobre impartir cursos de formación ás persoas voluntarias.

### **Quinta.- Inexistencia de relación laboral**

As accións de voluntariado realizadas ao amparo de presente convenio non orixinarán vínculo laboral nin contractual de ningún tipo entre as persoas voluntarias e a consellería e organismo asinantes.

### **Sexta.- Protección de datos**

As partes comprométense a manter o segredo en relación cos datos de carácter persoal dos usuarios do programa que afectan á súa intimidade e, en particular, a dar cumprimento ao establecido no Regulamento (UE) 2016/679 do Parlamento Europeo e do Consello, do 27 de abril de 2016 relativo á protección das persoas físicas no que respecta ao tratamento de datos persoais e á libre circulación destes datos e pola que se deroga a Directiva 95/46/CE, así como o resto da lexislación vixente nesta materia.

En consecuencia, as partes asinantes do presente convenio e as persoas voluntarias que teñan acceso a datos de carácter persoal comprométense a gardar a máis estrita confidencialidade



respecto a calquera das informacións, documentos ou datos de carácter persoal aos que puideran ter acceso e ao deber de gardalos, sen que poidan utilizalos para usos diferentes aos previstos no mesmo, e facer constar, de maneira expresa, que velaran polo cumprimento da normativa de protección de datos persoais de aplicación en cada caso. Estas obrigas subsistirán incluso despois de finalizar as relacións convencionais entre as partes.

O Servizo Galego de Saúde terá acceso a aqueles datos de carácter persoal das persoas voluntarias, que sexan necesarios para o cumprimento do estipulado neste convenio. O Servizo Galego de Saúde unicamente tratará os datos das persoas voluntarias que lles facilite a Consellería de Cultura, Lingua e Xuventude conforme ás instrucións desta, comprometéndose a non aplicalos nin empregalos para fins diferentes dos previstos no presente convenio. Asemade comprométese a non comunicar tales datos, nin sequera para a súa conservación, a outras persoas.

### **Sétima.- Vixencia.**

Este convenio de colaboración producirá os seus efectos a partir da data da súa sinatura e ata o 1 de decembro de 2026, que se poderá prorrogar, por acordo expreso das partes, ata un máximo de catro anos adicionais.

### **Oitava.- Comisión mixta paritaria**

1. Ao obxecto de velar polo cumprimento xeral das cláusulas do presente convenio e coordinar as accións previstas, creárase unha comisión mixta paritaria integrada por dúas persoas da Consellería de Cultura, Lingua e Xuventude, unha delas a persoa titular da Dirección Xeral de Xuventude, ou persoa que a substitúa, que a presidirá, e dúas persoas do Servizo Galego de Saúde, unha delas a persoa titular da Dirección Xeral de Asistencia Sanitaria, ou persoa que a substitúa. A persoa titular da Dirección Xeral de Xuventude designará ademais unha persoa que desenvolverá as funcións de secretaría, con voz pero sen voto.

2. Serán competencias xerais desta comisión:

a) A avaliación do desenvolvemento do presente convenio.



- b) Elevación de propostas de sucesivos programas.
- c) A proposta da prórroga do convenio ou da súa resolución.
- d) O estudo e asesoramento respecto de cantas cuestións sexan sometidas á Comisión por calquera das partes.

### **Novena.- Réxime xurídico e resolución de conflitos**

Este convenio de colaboración ten natureza administrativa, e rexeráse pola Lei 40/2015, do 1 de outubro, de Réxime Xurídico do Sector Público, e pola Lei 14/2013, do 26 de decembro, de racionalización do sector público autonómico. Encádrase dentro dos medios e instrumentos que o artigo 10 da Lei 14/2013, do 26 de decembro, prevé para facer efectiva a colaboración entre os órganos da Administración xeral da Comunidade Autónoma de Galicia e as entidades instrumentais que integran o sector público autonómico.

De conformidade co disposto no artigo 6 da Lei 9/2017, do 8 de novembro, de Contratos do Sector Público, pola que se traspoñen ao ordenamento xurídico español as Directivas do Parlamento Europeo e do Consello 2014/23/UE e 2014/24/UE, de 26 de febreiro de 2014, o presente convenio está excluído do ámbito de aplicación desta lei. Non obstante de conformidade co previsto no artigo 4 da dita lei aplicaranse os principios desta para resolver as dúbidas e lagoas que puideran presentarse.

As discrepancias que poidan producir resolveranse nos termos previstos no artigo 18 da Lei 14/2013, do 26 de decembro, e no artigo 13 da Lei 16/2010, do 17 de decembro, para os conflitos de atribucións.

### **Décima.- Causas de resolución**

Serán causas de resolución do presente convenio as seguintes:

- a) O incumprimento manifesto total ou parcial das obrigas asumidas por calquera das partes.
- b) A denuncia expresa dalgunha das partes, con previo aviso de, como mínimo, dous meses de



antelación á finalización do prazo de vixencia do convenio ou de calquera das súas prórrogas.

c) O acordo mutuo entre as partes.

d) O transcurso do prazo estipulado sen que se desenvolva o convenio.

e) As demais causas previstas na lexislación vixente que resulte de aplicación.

### **Décimo primeira.- Rexistro de Convenios, transparencia e bo goberno**

A sinatura deste convenio leva implícito o consentimento expreso das persoas intervenientes para que a Administración pública autonómica galega poida facer públicos os datos de carácter persoal e calquera outras especificacións que figuren nel, de acordo co disposto na Lei 19/2013, do 9 de decembro, de transparencia, acceso á información pública e bo goberno e a Lei galega 1/2016, do 18 de xaneiro, de transparencia e bo goberno.

O presente convenio será obxecto de inscrición no Rexistro de Convenios da Xunta de Galicia, nos termos previstos no Decreto 126/2006, do 20 de xuño, polo que se regula o Rexistro de Convenios da Xunta de Galicia.

E en proba de conformidade co exposto, as partes asinan o presente convenio na data que consta na sinatura electrónica.

O Conselleiro de Cultura, Lingua e  
Xuventude,

O Conselleiro de Sanidade e Presidente do  
Servizo Galego de Saúde,

José Carlos López Campos

Antonio Gómez Caamaño

